



# Leksyon 15

## "ANG CRISTO- HANON NGA KINABUHI"

### 1. Diin gikan ang kinabuhi sa usa ka Cristo- hanon?

- Ang kinabuhi sa usa ka Cristohanon naga-  
gikan kang Cristo.

Juan 14:6. Si Jesus mitubag kaniya, "Ako mao ang dalan, ug ang kamatuoran ug ang kinabuhi.

Juan 10:10. Ako mianhi aron sila maka-  
baton ug kinabuhi, ug sa pagpakabaton  
niini sa madagayaon gayud.

2. Unsaon nato sa pagkadawat niining kinabuhi gikan kang Cristo.

- Atong gidawat ang Cristohanong kinabuhi pinaagi sa pagtoo kang Jesu-Cristo, sa pagdawat kaniya ingon nga Manluluwas ug Ginoo, ug sa pagpaila sa uban nga kita iya na ni Cristo.

Juan 3:36. Ang mosalig sa Anak may kinabuhi nga dayon.

Juan 1:12. Apan sa tanang midawat kaniya sa tanang mitoo sa iyang ngalan, kanila naghatag siyag kagahum sa pagkahimong mga anak sa Dios.

3. Mahinungdanon ba ang pagpaila ngadto sa uban nga atong gidawat si Cristo ingon nga atong Manluluwas ug Ginoo.

Mga Taga-Roma 10:9, 10. Kay kon, pinaagi sa imong baba magasugid ikaw nga si Jesus mao ang Ginoo, ug magtoo sa sulod sa imong kasingkasing nga siya gibanhaw sa Dios gikan sa mga patay nan maluwas ikaw. Kay ang tawo magatoo diha sa iyang kasingkasing aron mamarung siya, ug siya magasugid pinaagi sa iyang baba aron maluwas siya.

Mateo 10:32. Busa bisan kinsa kadtong moila kanako atubangan sa mga tawo, ilhon ko usab siya sa atubangan sa akong Amahan nga anaa sa langit.

4. Unsaon nato sa pagpasundayag atubangan sa mga katawhan nga kita iya ni Cristo?

- Atong ipasundayag sa katawhan nga kita mga iya ni Cristo pinaagi sa pagpabautismo sa tubig ug sa pagpakighiusa sa panimalay sa Dios diha sa iyang Iglesia ug sa pagpamatuod ngadto sa uban kon unsay gibuhat ni Jesus sa atong kinabuhi. Marcos 16:16. Ang motoo ug magpabautismo maluwas.

Mateo 28:19. Busa panglakaw kamo ug himoa ninyong mga tinun-an ang tanang kanasuran sa pagpamautismo kanila sa ngalan sa Amahan ug sa Anak ug sa Espiritu Santo.

5. Unsaon nato pagpatubo ang atong kinabuhing Cristohanon?

- Motubo ang atong Cristohanong kinabuhi pinaagi sa pagpakaon sa atong mga kalag, o espiritu pinaagi sa pagbasa kanunay sa Bibliya ug pinaagi sa pag-ampo.

Mateo 4:4. Ang tawo mabuhi dili sa tinapay lamang kondili sa matag pulong nga magagula sa baba sa Dios.

1 Pedro 2:2. Ug sama sa mga bata nga bag-o pang nahimugso tinguhaon ninyo ang espirituhanong gatas, nga walay sambog, aron nga pinaagi niini kamo managtubo ngadto sa kaluwasan.

1 Mga taga-Tesalonica 5:17. Pag-ampo kamo sa walay hunong.

6. Makapila magbasa ang usa ka Cristohanon sa iyang Bibliya?

- Ang usa ka Cristohanon kinahanglan magbasa sa iyang Bibliya sa adlaw nga tanan. Salmo 1:1, 2. Bulahan ang tawo nga wala magalakaw sa tambag sa mga dautan... kon dili anaa sa kasugoan ni Jehovah. Ang iyang kalipay ug sa kasugoan niya nagpamalandong siya adlaw ug sa gabii.

Salmo 119:97. Oh hilabihan ang paghigugma ko sa imong kasugoan; kini mao ang akong gipalandong sa tibook nga adlaw.

7. Gikinahanglan ba sa usa ka Cristohanon ang pagsag-ulo ug pipila ka mga bersikulo sa Biblia?

- Oo. Kay kini pulong sa Dios nga nagatudlo sa usa ka magtotoo kon unsaon pagpahimuot sa Dios.

Salmo 119:11. Sa akong kasingkasing ginatipigan ko ang imong mga pulong, aron dili ako makasala batok kanimo.

Salmo 119:105. Ang imong pulong maoy lamparahan sa akong mga tiil, ug kaha-yag sa akong alagianan.

8. Makapila mag-ampo ang usa ka Cristohanon?

- Ang usa ka Cristohanon nagaampo sa tanang adlaw ug sa tanang panahon siya

may maampoong pagbati nagdto sa Dios. Salmo 5:3. Oh Jehovah sa buntag magapatalinghug ka sa akong tingog sa buntag ipatugbaw ko ang akong pag-ampo nganha kanimo ug maghulat ako.

Salmo 55:17. Kahaponon ug kabuntagon ug sa kaudtohon ako magamahay ug magaagulo ug mabati niya ang akong tingug.

**9. Nganong suginlan ta ang uban mahitungod kang Cristo?**

- Atong suginlan ang uban mahitungod kang Cristo, tungod kay kita iyang gipili ingon nga iyang mga saksi dinhi sa kalibutan karon.

Mga Buhat 1:8. Ug kamo mao unya ang akong mga saksi.

Marcos 16:15. Panglakaw kamo sa tibook kalibutan ug iwali ninyo ang mayong balita ngadto sa tibook nga kalibutan.

**10. Nganong ang Cristohanon kinahanglan magmabinantayon sa iyang mga panghunahuna?**

- Ang usa ka Cristohanon kinahanglan gayud magmabinantayon sa iyang mga panghunahuna tungod kay ang pulong sa Dios nag-ingon nga kon unsa ang atong mga panghunahuna mao usab kita.

Mga Proverbio 23:7. Kay maingon nga siya naghunahuna sa sulod sa iyang kaugalingon, sa ingon niana mao man siya. Mga Taga-Filipos 4:7. Ug ang kalinaw sa Dios nga labaw sa tanang pagpanabut, magabantay sa iyang mga kasingkasing ug sa inyong mga hunahuna diha kang Cristo Jesus.

11. Sa unsang paagi nga ang atong mga hunahuna kahamut-an sa Dios?

- Ang atong mga hunahuna makapahimuot lamang sa Dios kon kini mga mahinlo ug malunsay.

Mga Taga-Filipos 4:8. Sa katapusan mga igsoon bisan unsang butang tinuod, bisan unsang butang dungganan, bisan unsang butang matarung, bisan unsang butang ulay, bisan unsang butang maayong pamation, kon aduna may kahalangdon, kon aduna may pagka dalaygon, palandunga ninyo kining mga butanga.

12. Nganong ang usa ka Cristohanon kinahanglan magbantay kon unsay iyang tan-awon?

- Gikinahanglan sa usa ka Cristohanon nga magmabinantayon kon unsay iyang tan-awon kay ang iyang makita mosugyot kon unsay iyang mahunahuna.

Mateo 6:22. Ang mata mao ang suga sa lawas. Busa kon maayo ra ang imong mata, ang tibook mong lawas mapuno sa kahayag.

13. Nganong ang usa ka Cristohanon kinahanglan magbantay sa mga butang nga angay niyang patalinghugan?

- Tungod kay kon unsay iyang mapatalinghugan makasugyot ngadto sa iyang panghunahuna.

Marcos 4:24. Kinahanglan magbantay kamo sa inyong pagapamatian.

14. Nganong ang Cristohanon kinahanglan magbantay kon unsay iyang pagabasahon?

- Ang usa ka Cristohanon kinahanglan magbantay kon unsay iyang pagabasahon kay mahimo kini unyang patukoranan sa iyang mga panglihoklihok.

Josue 1:8. Ayaw pag-ibulag kining basahon sa kasugoan sa imong baba, hinoa magpalandong ka niana sa adlaw ug sa gabii aron himatngonan mo sa pagbuhat sumala sa tanan nga gisulat dinha ka sa ingon niana ikaw magmauswagon sa imong panaw, ug unya makab-ot mo ang kauswagan.

15. Nganong ang usa ka Cristohanon magbantay kon unsay iyang ipamulong?

- Ang Cristohanon kinahanglan magbantay kon unsay iyang ipamulong kay kini makaayo o makadaot ba hinoon sa uban.

Mga Proverbio 15:1, 2. Ang tubag nga malomo makapahupay sa kapungot, apan ang pulong nga mahait makapapukaw sa kasuko. Ang dila sa manggialamon sa

matul-id nagapamulong ug kahibalo apan ang baba sa mga buang nagabubo sa kabuangan. Ang mga mata ni Jehovah anaa sa tanang dapit nga nagabantay ibabaw sa dautan ug sa maayo.

Mga Proverbio 25:11. Ang usa ka pulong nga maayong pagkagamit sama sa mga mansanas nga bulawan diha sa linala nga salapi.

Salmo 19:14. Itugot nga ang mga pulong sa akong baba ug ang pagpamalandong sa akong kasingkasing mahimong kahi-mut-an sa imong mga mata o Jehovah bato ko ug mamamawi ko.

16. Kinahanglan ba sa usa ka Cristohanon ang pagkamabinantayon kon unsay iyang pagabuhaton?

- Oo. Gikinahanglan sa usa ka Cristohanon ang pagkamabinantayon kon unsay iyang pagabuhaton kay gimbut-an sa Dios nga siya magbuhat ug matarung.

Miqueas 6:8. Gipakita na niya kanimo o tawo kong unsa ang maayo; ug unsa ba ang gikinahanglan ni Jehovah kanimo, kondili ang pagbuhat sa minatarung ug ang paghigugma sa kalolot, ug ang paglakaw nga mapinaubsanon uban sa imong Dios.

17. Angayan ba nga magbantay kon kinsay higalaon sa usa ka Cristohanon?

- Oo. Kinahanglan nga pilion niya ang mga higala nga Cristohanon usab kay sa uban nga modaldal niya pahalayo sa Dios.



**Santiago 4:4.** Mga Maluibon! wala ba kamo masayud nga ang pakighigalaay uban sa kalibutan maoy pakig-away batok sa Dios? Busa bisan kinsa nga buot ma-kighigala sa kalibutan nagahimo sa iyang kaugalingon nga kaaway sa Dios.

18. Nganong gikinahanglan sa usa ka Cristohanon ang makanunayon nga pagsimba?

- Gikinahanglan sa usa ka Cristohanon ang pagsimba sa simbahan tungod kay ang pulong sa Dios nagsugo kaninyo sa pagsimba kauban sa ubang Cristohanon.

**Mga Taga-Roma 10:17.** Busa ang pagtoo magaabot gikan sa madungog ug ang madungog nagaabot pinaagi sa pagwali mahitungod kang Cristo.

**Mga Hebreohanon 10:25.** Sa dili pagbiya sa atong panagtigum, ingon sa ginabuhat sa pipila hinonoa sa pagdasig sa usa ug usa, ug ilabina gayud sa pagkita ninyo ug sa adlaw sa paghukom nagakaduol na.

19. Unsay gisaad sa Dios nga pagabuhaton ngadto sa mga tawo nga motabang sa Iglesia pinaagi sa ilang mga salapi?

- Ang Dios nagasaad ug panalangin ug kasuwagan ngadto sa mga tawo nga motabang sa iglesia pinaagi sa ilang mga salapi.

**Malaquias 3:10.** Dad-a ninyo ang tibook nga ikanapulo ngadto sa balay nga tipiganan, aron nga adunay kalan-on diha sa akong balay ug pinaagi niini sulayi ninyo ako karon, nag-ingon si Jehovah sa mga

panon, kong dili ba buksan ko ang kanyo ang mga tamboanan sa langit, ug buboan ko kamo sa panalangin, sa pagkaagi nga wala na unyay dapit nga igong kabutangan sa pagdawat niini.

20. Unsay kahulugan sa paghatag sa ikanapulo.

- Ang paghatag sa ikanapulo mao ang paghatag sa ikanapulong bahin sa maga-abot kanato ngadto sa buluhaton sa Ginoo.

Mga Hebreohanon 7:2. Ug alang kaniya gigahin ni Abraham ang ikapulo sa tanang butang.

21. Nganong mohatag gayud ang usa ka Cristohanon sa iyang ikanapulo?

- Mohatag gayud ang usa ka Cristohanon sa iyang ikanapulo tungod kay mao kini ang bahin nga gipangayo sa Dios sa iyang katawhan. Ang mga Fariseo nagahatag sa ilang ikanapulo ug si Jesus nagaingon nga ang atong Cristohanong pagkinabuhi magalabaw pa kay sa ila sa mga Fariseo. Genesis 28:22. Ug sa tanan nga imong igahatag kanako, sa pagkamatuod ang bahin nga ikapulo akong igahatag kanimo. Mateo 5:20. Kay sultihan ko kamo, nga kon ang inyong pagkamatarung dili gani molabaw sa ila sa mga escriba ug sa mga Fariseo dili gayud kamo nakasulod sa gingharian sa langit.

**Mateo 23:23.** Alaut kamo mga escriba ug mga Fariseo mga maut! kay naghatag kamog ikapulo sa yerbabuyna ug sa anis ug sa kamino apan wala ninyo buhata ang labi pang hinungdanon nga mga ug kalooy ug pagtoo, kining mga butanga kinahanglan gayud unta nga inyong pagabuhaton sa walay pagbiya sa uban.

#### ANG IMONG PAGABUHATON

1. Nagabuhat ba ikaw sa mga butang nga imong nasayran niining leksyona? Kon wala hangyoa ang Dios sa pagtabang kanimo sa pagtubo sa imong espirituhang mga pagkinabubi, aron imong matagamtam ang katamis sa kinabuhing Cristohanon.
2. Kon masag-ulo na nimo pag-ayo ang mga sag-ulohon tubaga ang mga pangutana sa Talaan sa Tinun-an alang sa ika-napulong lima nga leksyon.